



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Distritu Suai

26 Janeiru 2015

**Lideransa komunitária sira prefere utiliza mekanismu justisa formal hodi
resolve krime ne'ebé mosu iha sira nia suku**

Iha 22 Janeiru 2015, Judicial System Monitoring Program-JSMP fasilita treinamentu kona-ba asesu ba justisa formal ba membru estrutura suku sira iha Aledeia Sadahur, Suku Fohorem, Sub-distritu Fohorem, Distritu Suai-Covalima.

Treinamentu ne'e hahu ho introdusaun kona-ba istoria hari'i JSMP no ninia ezistensia too ohin loron hodi tau matan ba funsionamentu sistema justisa no prosesu lejislasaun iha Timor Leste. Aliende ne'e esplika mós objetivu hosi treinamentu ne'e atu fahe informasaun kona-ba asesu ba justisa formal hodi hasa'e koñesimentu lideransa komunitária inklui comunidade oinsa atu halo keisa tuir dalan formal ne'ebé eziste ona iha Timor Leste.

Partisipante sira ne'ebé partisipa iha treinamentu ne'e hamutuk nain 31, ne'ebé kompostu hosi fetu nain 16 no mane nain 15. Partisipante sira ne'e inklui estrutura suku, representante grupu fetu, joventude fetu no membru comunidade fetu sira.

Materia treinamentu sira ne'ebé apresenta no diskuti durante sesaun treinamentu ne'e mak kobre asuntu sira kona-ba konseitu Lei Kontra Violénsia Doméstika no provizaun sira Kódigu Penál ne'ebé hatu'ur tipu kazu sira ne'ebé klasifika nu'udar kazu violénsia doméstika tuir artigu 35 Lei Kontra Violénsia Doméstika. Aleinde ne'e, treinamentu ne'e mós kobre provizaun relevantes sira iha kódigu penal ne'ebé komete iha kontestu família no provizaun sira iha kódigu prosesu penal.

Iha oportunidade ne'e mós, diskuti kona-ba kna'ar no responsabilidade institusionál hosi kada autór judisiáriu hanesan juis, ministériu públiku no ajente prosesual sira hanesan defensor públiku, advogadu privadu, polísia no oinsa atu asesu ba justisa formal wainhira sai nu'udar arguidu ka sai hanesan vítima husi krime ruma.

“Estrutura suku sira hanesan pilar ida ne'ebé importante iha sosiedade nia leet. JSMP hanoin katak treinamentu ba estrutura suku sira relasiona ho Lei Kontra Violensia Domesika no asesu ba justisa formal, atu hametin sira nia koñesimentu iha kazu sira ne'ebé maioria akontese iha sosiedade, nune'e bainhira akontese problema ruma iha sira nia suku, sira bele trata kazu hirak ne'e tuir mekanismu formal ne'ebé sira hatene ona,” dehan Diretór Ezekutivu JSMP, Luis de Oliveira Sampaio.

Xefe Suku Fohorem, Sr. Agosto Cardoso haktuir katak comunidade kontente ho JSMP nia prezensa no bele hili sira nia suku hodi fahe informasaun relevantes sira kona-ba lala'ok justisa formal nian ba sira.

Xefe suku ne'e haktuir katak iha sira nia suku akontese kazu barak hanesan kazu feen laen baku balu, kazu involve labarik kiik, kazu hadau malu rai, divorsiu, abortu, no kazu sira ne'ebé involve membru polísia, maibé sira laiha informasaun ne'ebé naton oinsa atu halo prosesu ba kazu sira ne'e. Tanba ne'e sira rezolve deit iha nivel suku.

Durante treinamentu JSMP observa katak partisipantes sira liu-liu estrutura suku, konfude tebes kona-ba krime violénsia doméstika, no krime sira seluk ne'ebé durante ne'e rezolve iha nivel suku ka aldeia deit tanba antes ne'e sira konsidera krime violénsia doméstika hanesan problema uma laran. Tanba ne'e JSMP, hanoin katak atividade divulgasaun informasaun legál sira persiza kontinua nafatin, atu fasilita comunidade sira liu-liu estrutura suku sira iha komprensaun adekuada ba provizaun legál aplikável sira.

Iha parte seluk, lia-nain sira husu ba JSMP, atu iha futuru bele realiza treinamentu ho asuntos hanesan iha nivel aldeia sira hodi involve comunidade ne'ebé barak liutan. Sira mós husu ba JSMP atu hato'o sira nia preokupasaun sira ne'e liu-liu relasiona ho asuntu divulgasaun informasaun ba instituisaun estadu relavantes hodi halo divulgasaun informasaun ba comunidade iha área remotas ne'ebé susar atu asesu ba informasaun liu-liu iha setór justisa nian.

JSMP observa katak partisipante sira ativu teb-tebes hodi halo diskusaun no husu perguntas relasiona ho krime violénsia doméstika no kazu sira seluk ne'ebé sira identifika. Bazeia ba preokupasaun sira ne'e hotu fasilitador responde tuir lei ne'ebé vigora partikularmente kona-ba prezensa Lei Kontra Violénsia Doméstika katak krime violénsia doméstika hanesan krime públiku.

JSMP fiar katak treinamentu ne'e, sei kontinua hametin diak liutan koñesimentu comunidade iha área rural sira no liu-liu atu fasilita sira kona-bá opsaun oinsa atu trata kazu ho natureza krime semi públiku no públiku ne'ebé involve sira nia membru família. Treinamentu ne'e ensera ho entrega JSMP nia brosur no publikasaun ba xefe suku.

Treinamentu ne'e realiza ho apoiu finanseiru husi **Embaixada Canada iha Indonezia**.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795

webiste: www.jsmp.tl

facebook www.facebook.com/timorleste.jsmp

twitter: @JSMPtl